

1 Kurinthyon

Salām

¹ Yih khat Paulus kī taraf se hai, jo Allāh ke irāde se Masīh Īsā kā bulāyā huā rasūl hai, aur hamāre bhāi Sosthines kī taraf se.

² Maiñ Kurinthus meñ maujūd Allāh kī jamāt ko likh rahā hūñ, āp ko jinheñ Masīh Īsā meñ muqaddas kiyā gayā hai, jinheñ muqaddas hone ke lie bulāyā gayā hai. Sāth hī yih khat un tamām logoñ ke nām bhī hai jo har jagah hamāre Ḳhudāwand Īsā Masīh kā nām lete haiñ jo un kā aur hamārā Ḳhudāwand hai.

³ Hamārā Ḳhudā Bāp aur Ḳhudāwand Īsā Masīh āp ko fazl aur salāmatī atā karen.

Shukr

⁴ Maiñ hameshā āp ke lie Ḳhudā kā shukr kartā hūñ ki us ne āp ko Masīh Īsā meñ itnā fazl baḳhshā hai. ⁵ Āp ko us meñ har lihāz se daulatmand kiyā gayā hai, har qism kī taqrīr aur ilm-o-irfān meñ. ⁶ Kyoñki Masīh kī gawāhī ne āp ke darmiyān zor pakar liyā hai, ⁷ is lie āp ko hamāre Ḳhudāwand Īsā Masīh ke zuhūr kā intazār karte karte kisī bhī barkat meñ kamī nahīñ. ⁸ Wuhī āp ko āḳhir tak mazbūt banāe rakhegā, is lie āp hamāre Ḳhudāwand Īsā Masīh kī dūsri āmad ke din be'ilzām ṭhahreñge. ⁹ Allāh par pūrā etamād kiyā jā saktā hai jis ne āp ko bulā kar apne Farzand hamāre Ḳhudāwand Īsā Masīh kī rifāqat meñ sharīk kiyā hai.

Kurinthiyon kī Pārṭībāzī

¹⁰ Bhāiyo, main apne Ḳhudāwand Īsā Masīh ke nām meñ āp ko tākīd kartā hūn ki āp sab ek hī bāt kaheñ. Āp ke darmiyān pārṭībāzī nahīn balki ek hī soch aur ek hī rāy honī chāhie. ¹¹ Kyonki mere bhāiyo, āp ke bāre meñ mujhe Ḳhaloe ke ghar wālon se mālūm huā hai ki āp jhagaron meñ ulajh gae haiñ. ¹² Matlab yih hai ki āp meñ se koī kahtā hai, “Main Paulus kī pārṭī kā hūn,” koī “Main Apullos kī pārṭī kā hūn,” koī “Main Kaifā kī pārṭī kā hūn” aur koī ki “Main Masīh kī pārṭī kā hūn.” ¹³ Kyā Masīh baṭ gayā? Kyā āp kī ḳhātir Paulus ko salīb par chaṛhāyā gayā? Yā kyā āp ko Paulus ke nām se baptismā diyā gayā?

¹⁴ Ḳhudā kā shukr hai ki main ne āp meñ se kisī ko baptismā nahīn diyā siwāe Krispus aur Gayus ke. ¹⁵ Is lie koī nahīn kah saktā ki main ne Paulus ke nām se baptismā pāyā hai. ¹⁶ Hāñ main ne Stifanās ke gharāne ko bhī baptismā diyā. Lekin jahān tak merā ḳhayāl hai is ke alāwā kisī aur ko baptismā nahīn diyā. ¹⁷ Masīh ne mujhe baptismā dene ke lie rasūl banā kar nahīn bhejā balki is lie ki Allāh kī ḳhushḳhabrī sunāūñ. Aur yih kām mujhe duniyāwī hikmat se ārāstā taqrīr se nahīn karnā hai tāki Masīh kī salīb kī tāqat beasar na ho jāe.

Salīb kā Paighām

¹⁸ Kyonki salīb kā paighām un ke lie jin kā anjām halākat hai bewuqūfī hai jabki hamāre lie jin kā anjām najāt hai yih Allāh kī qudrat hai.

¹⁹ Chunāñche pāk nawishton meñ likhā hai,

“Maiñ dānishmandon kī dānish ko tabāh karūnga

aur samajhdāron kī samajh ko radd karūnga.”

²⁰ Ab dānishmand shaḡhs kahān hai? Ālim kahān hai? Is jahān kā munāzare kā māhir kahān hai? Kyā Allāh ne duniyā kī hikmat-o-dānāi ko bewuqūfi sābit nahīn kiyā?

²¹ Kyonki agarche duniyā Allāh kī dānāi se ghirī huī hai to bhī duniyā ne apnī dānāi kī badaulat Allāh ko na pahchānā. Is lie Allāh ko pasand āyā ki wuh salīb ke paighām kī bewuqūfi ke zariye hī imān rakhne wālon ko najāt de.

²² Yahūdī taqāzā karte haiñ ki ilāhī bāton kī tasdīq ilāhī nishānon se kī jāe jabki Yūnānī dānāi ke wasīle se in kī tasdīq ke ḡhāhān haiñ. ²³ Is ke muqābale meñ ham Masīh-e-maslūb kī munādī karte haiñ. Yahūdī is se ṡhokar khā kar nārāz ho jāte haiñ jabki ḡhairyahūdī ise bewuqūfi qarār dete haiñ. ²⁴ Lekin jo Allāh ke bulāe hue haiñ, ḡhāh wuh Yahūdī hoñ ḡhāh Yūnānī, un ke lie Masīh Allāh kī qudrat aur Allāh kī dānāi hotā hai. ²⁵ Kyonki Allāh kī jo bāt bewuqūfi lagtī hai wuh insān kī dānāi se zyādā dānishmand hai. Aur Allāh kī jo bāt kamzor lagtī hai wuh insān kī tāqat se zyādā tāqatwar hai.

²⁶ Bhāiyo, is par ḡhaur karen ki āp kā kyā hāl thā jab ḡhudā ne āp ko bulāyā. Āp meñ se kam haiñ jo duniyā ke meyār ke mutābiq dānā haiñ, kam haiñ jo tāqatwar haiñ, kam haiñ jo āli ḡhāndān se haiñ. ²⁷ Balki jo duniyā kī nigāh meñ bewuqūf hai use Allāh ne chun liyā tāki dānāon ko sharmindā kare. Aur jo duniyā meñ kamzor hai use Allāh ne chun liyā tāki tāqatwaron ko

sharmindā kare. ²⁸ Isī tarah jo duniyā ke nazdīk zalīl aur haqīr hai use Allāh ne chun liyā. Hān, jo kuchh bhī nahīn hai use us ne chun liyā tāki use nest kare jo bazāhir kuchh hai. ²⁹ Chunānche kōī bhī Allāh ke sāmne apne par faḡhr nahīn kar saktā. ³⁰ Yih Allāh kī taraf se hai ki āp Masīh Īsā meñ haiñ. Allāh kī baḡhshish se Īsā ḡhud hamārī dānāī, hamārī rāstbāzī, hamārī taqdis aur hamārī maḡhlasī ban gayā hai. ³¹ Is lie jis tarah kalām-e-muḡaddas farmātā hai, “Faḡhr karne wālā ḡhudāwand hī par faḡhr kare.”

2

Paulus kī Sādā Munādī

¹ Bhāiyo, mujh par bhī ḡhaur karen. Jab maiñ āp ke pās āyā to maiñ ne āp ko Allāh kā bhed moṭe moṭe alfāz meñ yā falsafiyānā hikmat kā izhār karte hue na sunāyā. ² Wajah kyā thī? Yih ki maiñ ne irādā kar rakhā thā ki āp ke darmiyān hote hue maiñ Īsā Masīh ke siwā aur kuchh na jānūñ, ḡhāskar yih ki use maslūb kiyā gayā. ³ Hān maiñ kamzorhāl, ḡhauf khāte aur bahut thartharāte hue āp ke pās āyā. ⁴ Aur guftḡ aur munādī karte hue maiñ ne duniyāwī hikmat ke baṛe zordār alfāz kī mārifat āp ko qāyl karne kī koshish na kī, balki Rūhul-quḡds aur Allāh kī quḡdrat ne merī bātoñ kī tasdiq kī, ⁵ tāki āp kā imān insānī hikmat par mabnī na ho balki Allāh kī quḡdrat par.

ḡhalat aur Sahīh Dānāī

⁶ Dānāī kī bāteñ ham us waqt karte haiñ jab kāmil imān rakhne wāloñ ke darmiyān hote

haiñ. Lekin yih dānāi maujūdā jahān kī nahīn aur na is jahān ke hākimoñ hī kī hai jo miṭne wāle haiñ. ⁷ Balki ham Khudā hī kī dānāi kī bāteñ karte haiñ jo bhed kī sūrat meñ chhupī rahī hai. Allāh ne tamām zamānoñ se peshtar muqarrar kiyā hai ki yih dānāi hamāre jalāl kā bāis bane. ⁸ Is jahān ke kisī bhī hākim ne is dānāi ko na pahchānā, kyonki agar wuh pahchān lete to phir wuh hamāre jalāli Khudāwand ko maslūb na karte. ⁹ Dānāi ke bāre meñ pāk nawishte bhī yihī kahte haiñ,

“Jo na kisī āñkh ne dekhā, na kisī kān ne sunā,
aur na insān ke zahan meñ āyā,
use Allāh ne un ke lie taiyār kar diyā
jo us se muhabbat rakhte haiñ.”

¹⁰ Lekin Allāh ne yihī kuchh apne Rūh kī mārifat ham par zāhir kiyā kyonki us kā Rūh har chīz kā khoj lagātā hai, yahān tak ki Allāh kī gahrāiyon kā bhī. ¹¹ Insān ke bātin se kaun wāqif hai siwāe insān kī rūh ke jo us ke andar hai? Isī tarah Allāh se tālluq rakhne wālī bātoñ ko koī nahīn jāntā siwāe Allāh ke Rūh ke. ¹² Aur hameñ duniyā kī rūh nahīn milī balki wuh Rūh jo Allāh kī taraf se hai tāki ham us kī atākardā bātoñ ko jān sakeñ.

¹³ Yihī kuchh ham bayān karte haiñ, lekin aise alfāz meñ nahīn jo insānī hikmat se hameñ sikhāyā gayā balki Rūhul-quds se. Yoñ ham ruhānī haqīqaton kī tashrīh ruhānī logon ke lie karte haiñ. ¹⁴ Jo shaḡhs ruhānī nahīn hai wuh Allāh ke Rūh kī bātoñ ko qabūl nahīn kartā kyonki wuh us ke nazdik bewuqūfi haiñ. Wuh unheñ pahchān nahīn saktā kyonki un kī parakh

sirf ruhānī shaḵhs hī kar saktā hai. ¹⁵ Wuhī har chīz parakh letā hai jabki us kī apnī parakh koī nahīn kar saktā. ¹⁶ Chunānche pāk kalām meñ likhā hai,

“Kis ne Rab kī soch ko jānā?

Kaun us ko tālīm degā?”

Lekin ham Masīh kī soch rakhte haiñ.

3

Kurinthus kī Bachagānā Hālat

¹ Bhāiyo, maiñ āp se ruhānī logoñ kī bāteñ na kar sakā balki sirf jismānī logoñ kī. Kyonki āp ab tak Masīh meñ chhoṭe bachche haiñ. ² Maiñ ne āp ko dūdh pilāyā, ṭhos ḡhizā na khilāī, kyonki āp us waqt is qābil nahīn the balki ab tak nahīn haiñ. ³ Abhī tak āp jismānī haiñ, kyonki āp meñ hasad aur jhagarā pāyā jātā hai. Kyā is se yih sābit nahīn hotā ki āp jismānī haiñ aur Rūh ke baḡhair chalte haiñ? ⁴ Jab koī kahtā hai, “Maiñ Paulus kī pārṭī kā hūñ” aur dūsrā, “Maiñ Apullos kī pārṭī kā hūñ” to kyā is se yih zāhir nahīn hotā ki āp ruhānī nahīn balki insānī soch rakhte haiñ?

Paulus aur Apullos kī Haisiyat

⁵ Apullos kī kyā haisiyat hai aur Paulus kī kyā? Donoñ naukar haiñ jin ke wasile se āp imān lāe. Aur ham meñ se har ek ne wuhī ḡhidmat anjām dī jo Ḳhudāwand ne us ke sapurd kī. ⁶ Maiñ ne paude lagāe, Apullos pānī detā rahā, lekin Allāh ne unheñ ugne diyā. ⁷ Lihāzā paudā lagāne wālā aur ābpāshī karne wālā donoñ kuchh bhī nahīn, balki Ḳhudā hī sab kuchh hai jo paude ko phalne-phūlne detā hai. ⁸ Paudā lagāne aur pānī dene

wālā ek jaise haiñ, albattā har ek ko us kī mehnat ke mutābiq mazdūrī milegī. ⁹ Kyoñki ham Allāh ke muāwin haiñ jabki āp Allāh kā khet aur us kī imārat haiñ.

¹⁰ Allāh ke us fazl ke mutābiq jo mujhe baḡhshā gayā maiñ ne ek dānishmand ṭhekedār kī tarah buniyād rakhī. Is ke bād koī aur us par imārat tāmīr kar rahā hai. Lekin har ek dhyān rakhe ki wuh buniyād par imārat kis tarah banā rahā hai. ¹¹ Kyoñki buniyād rakhī jā chukī hai aur wuh hai Īsā Masīh. Is ke alāwā koī bhī mazīd koī buniyād nahīn rakh saktā. ¹² Jo bhī is buniyād par kuchh tāmīr kare wuh muḡhtalif mawād to istemāl kar saktā hai, masalan sonā, chāñdī, qīmtī patthar, lakaṛī, sūkhī ghās yā bhūsā, ¹³ lekin āḡhir meñ har ek kā kām zāhir ho jāegā. Qiyāmat ke din kuchh poshīdā nahīn rahegā balki āg sab kuchh zāhir kar degī. Wuh sābit kar degī ki har kisī ne kaisā kām kiyā hai. ¹⁴ Agar us kā tāmīrī kām na jalā jo us ne is buniyād par kiyā to use ajr milegā. ¹⁵ Agar us kā kām jal gayā to use nuqsān pahuñchegā. Ḳhud to wuh bach jāegā magar jalte jalte.

¹⁶ Kyā āp ko mālūm nahīn ki āp Allāh kā ghar haiñ, aur āp meñ Allāh kā Rūh sukūnat kartā hai? ¹⁷ Agar koī Allāh ke ghar ko tabāh kare to Allāh use tabāh karegā, kyoñki Allāh kā ghar maḡhsūs-o-muḡaddas hai aur yih ghar āp hī haiñ.

Apne bāre meñ Sheḡhī na Mārñā

¹⁸ Koī apne āp ko fareb na de. Agar āp meñ se koī samjhe ki wuh is duniyā kī nazar meñ dānishmand hai to phir zarūrī hai ki wuh

bewuqūf bane tāki wāqaī dānishmand ho jāe. ¹⁹ Kyoñki is duniyā kī hikmat Allāh kī nazar meñ bewuqūfi hai. Chunāñche muqaddas nawishton meñ likhā hai, “Wuh dānishmandoñ ko un kī apnī chālākī ke phande meñ phañsā detā hai.” ²⁰ Yih bhī likhā hai, “Rab dānishmandoñ ke khayālāt ko jāntā hai ki wuh bātil haiñ.” ²¹ Ġharz koī kisī insān ke bāre meñ shekhī na māre. Sab kuchh to āp kā hai. ²² Paulus, Apullos, Kaifā, duniyā, zindagī, maut, maujūdā jahān ke aur mustaqbil ke umūr sab kuchh āp kā hai. ²³ Lekin āp Masīh ke haiñ aur Masīh Allāh kā hai.

4

Khudāwand ke Khādīm aur Un kā Kām

¹ Ġharz log hamēñ Masīh ke khādīm samjheñ, aise nigarān jinheñ Allāh ke bhedoñ ko kholne kī zimmedārī dī gaī hai. ² Ab nigarānoñ kā farz yih hai ki un par pūrā etamād kiyā jā sake. ³ Mujhe is bāt kī zyādā fikr nahīn ki āp yā koī duniyāwī adālat merā ehtisāb kare, balki main khud bhī apnā ehtisāb nahīn kartā. ⁴ Mujhe kisī ġhaltī kā ilm nahīn hai agarche yih bāt mujhe rāstbāz qarār dene ke lie kāfī nahīn hai. Khudāwand khud merā ehtisāb kartā hai. ⁵ Is lie waqt se pahle kisī bāt kā faisla na karen. Us waqt tak intazār karen jab tak Khudāwand na āe. Kyoñki wuhī tārīkī meñ chhupī huī chizoñ ko raushnī meñ lāegā aur diloñ kī mansūbābandiyon ko zāhir kar degā. Us waqt Allāh khud har fard kī munāsib tārīf karegā.

Kurinthyon kī Shekhībāzī

⁶ Bhāiyo, main ne in bāton kā itlāq apne aur Apullos par kiyā tāki āp ham par ghaur karte hue Allāh ke kalām kī hudūd jān leñ jin se tajāwuz karnā munāsib nahīn. Phir āp phul kar ek shakhs kī himāyat karke dūsre kī muḥhālafat nahīn kareñge. ⁷ Kyonki kaun āp ko kisī dūsre se afzal qarār detā hai? Jo kuchh āp ke pās hai kyā wuh āp ko muft nahīn milā? Aur agar muft milā to is par shekhī kyon mārte haiñ goyā ki āp ne use apnī mehnat se hāsil kiyā ho?

⁸ Wāh jī wāh! Āp ser ho chuke haiñ. Āp amīr ban chuke haiñ. Āp hamāre baḡhair bādshāh ban chuke haiñ. Kāsh āp bādshāh ban chuke hote tāki ham bhī āp ke sāth hukūmat karte! ⁹ Is ke bajāe mujhe lagtā hai ki Allāh ne hamāre lie jo us ke rasul haiñ Romī tamāshāgāh meñ sab se nichlā darjā muqarrar kiyā hai, jo un logoñ ke lie maḥsūs hotā hai jinheñ sazā-e-maut kā faislā sunāyā gayā ho. Hāñ, ham duniyā, farishton aur insānon ke sāmne tamāshā ban gae haiñ. ¹⁰ Ham to Masīh kī khatir bewuqūf ban gae haiñ jabki āp Masīh meñ samajhdār khayāl kie jāte haiñ. Ham kamzor haiñ jabki āp tāqatwar. Āp kī izzat kī jāti hai jabki hamārī be'izzatī. ¹¹ Ab tak hameñ bhūk aur pyās satātī hai. Ham chitharon meñ malbūs goyā nange phirte haiñ. Hameñ mukke māre jāte haiñ. Hamārī koī mustaqil rihāishgāh nahīn. ¹² Aur baḡī mashaqqat se ham apne hāthon se rozī kamāte haiñ. Lān-tān karne wālon ko ham barkat dete haiñ, izā dene wālon ko bardāsh karte haiñ. ¹³ Jo hameñ burā-bhalā

kahte haiñ unheñ ham duā dete haiñ. Ab tak ham duniyā kā kūṛā-karkaṭ aur ḡhilāzat bane phirte haiñ.

Paulus Kurinthyon kā Ruhānī Bāp Hai

¹⁴ Maiñ āp ko sharmindā karne ke lie yih nahīñ likh rahā, balki apne pyāre bachche jān kar samjhāne kī ḡharz se. ¹⁵ Beshak Masīh Īsā meñ āp ke ustād to beshumār haiñ, lekin bāp kam haiñ. Kyoñki Masīh Īsā meñ maiñ hī āp ko Allāh kī ḡhushḡhabrī sunā kar āp kā bāp banā. ¹⁶ Ab maiñ tākīd kartā hūñ ki āp mere namūne par chalen. ¹⁷ Is lie maiñ ne Tīmuthiyus ko āp ke pās bhej diyā jo Ḳhudāwand meñ merā pyārā aur wafādār beṭā hai. Wuh āp ko Masīh Īsā meñ merī un hidāyāt kī yād dilāegā jo maiñ har jagah aur imāndāron kī har jamāt meñ detā hūñ.

¹⁸ Āp meñ se bāz yon phūl gae haiñ jaise maiñ ab āp ke pās kabhī nahīñ āūngā. ¹⁹ Lekin agar Ḳhudāwand kī marzī huī to jald ā kar mālūm karūnga ki kyā yih phūle hue log sirf bāteñ kar rahe haiñ yā kī Allāh kī qudrat un meñ kām kar rahī hai. ²⁰ Kyoñki Allāh kī bādshāhī ḡhālī bāton se zāhir nahīñ hotī balki Allāh kī qudrat se. ²¹ Kyā āp chāhte haiñ ki maiñ chhaṛī le kar āp ke pās āūñ yā pyār aur halīmī kī rūh meñ?

5

Zinākārī

¹ Yih bāt hamāre kānon tak pahuñchī hai ki āp ke darmiyān zinākārī ho rahī hai, balki aisī zinākārī jise Ḡhairyahūdī bhī rawā nahīñ samajhte. Kahte haiñ ki āp meñ se kisī ne apnī

sauteli mān * se shādī kar rakhī hai. ² Kamāl hai ki āp is fel par nādīm nahīn balki phūle phir rahe haiñ! Kyā munāsib na hotā ki āp dukh mahsūs karke is badī ke murtakib ko apne darmiyān se khārij kar dete? ³ Go main jism ke lihāz se āp ke pās nahīn, lekin Rūh ke lihāz se zarūr hūn. Aur main us shaḥs par fatwā is tarah de chukā hūn jaise ki main āp ke darmiyān maujūd hūn. ⁴ Jab āp hamāre Ḳhudāwand Īsā ke nām meñ jamā hoñge to main Rūh meñ āp ke sāth hūngā aur hamāre Ḳhudāwand Īsā kī qudrat bhī. ⁵ Us waqt aise shaḥs ko Iblīs ke hawāle karen tāki sirf us kā jism halāk ho jāe, lekin us kī rūh Ḳhudāwand ke din rihāi pāe.

⁶ Āp kā faḥr karnā achchhā nahīn. Kyā āp ko mālūm nahīn ki jab ham thoṛā-sā khamīr tāzā gundhe hue āṭe meñ milāte haiñ to wuh sāre āṭe ko khamīr kar detā hai? ⁷ Apne āp ko khamīr se pāk-sāf karke tāzā gundhā huā āṭā ban jāeñ. Darhaqīqat āp haiñ bhī pāk, kyoñki hamārā Īd-e-Fasah kā lelā Masih hamāre lie zabah ho chukā hai. ⁸ Is lie āie ham purāne khamīrī āṭe yānī burāi aur badī ko dūr karke tāzā gundhe hue āṭe yānī khulūs aur sachchāi kī roṭiyān banā kar Fasah kī Īd manāeñ.

⁹ Main ne khat meñ likhā thā ki āp zinākāron se tālluq na rakheñ. ¹⁰ Merā matlab yih nahīn thā ki āp is duniyā ke zinākāron se tālluq munqate kar leñ yā is duniyā ke lālchiyon, luṭeron aur butparaston se. Agar āp aisā karte to lāzim hotā ki āp duniyā hī se kūch kar jāte.

* **5:1** Lafzī tarjumā: bāp kī biwī, lekin ghāliban is se murād sauteli mān hai.

¹¹ Nahīn, merā matlab yih thā ki āp aise shaḡhs se tālluq na rakheñ jo Masīh meñ to bhāi kahlātā hai magar hai wuh zinākār yā lālchī yā butparast yā gālī-galoch karne wālā yā sharābī yā luṭerā. Aise shaḡhs ke sāth khānā tak bhī na khāeñ.

¹² Maiñ un logon kī adālat kyon kartā phirūn jo īmāndāron kī jamāt se bāhar haiñ? Kyā āp ḡhud bhī sirf un kī adālat nahīn karte jo jamāt ke andar haiñ? ¹³ Bāhar wālon kī adālat to ḡhudā hī karegā. Kalām-e-muḡaddas meñ yon likhā hai, ‘Sharīr ko apne darmiyān se nikāl do.’

6

Muḡaddamābāzī

¹ Āp meñ yih jurrat kaise paidā huī ki jab kisī kā kisī dūsre īmāndār ke sāth tanāzā ho to wuh apnā jhagaṛā bedīnon ke sāmne le jātā hai na ki muḡaddason ke sāmne? ² Kyā āp nahīn jānte ki muḡaddasīn duniyā kī adālat kareñge? Aur agar āp duniyā kī adālat kareñge to kyā āp is qābil nahīn ki chhoṭe moṭe jhagaṛon kā faislā kar sakeñ? ³ Kyā āp ko mālūm nahīn ki ham farishton kī adālat kareñge? To phir kyā ham rozmarā ke muāmalāt ko nahīn niṭṭā sakte? ⁴ Aur is qism ke muāmalāt ko faisal karne ke lie āp aise logon ko kyon muḡarrar karte haiñ jo jamāt kī nigāh meñ koī haisiyat nahīn rakhte? ⁵ Yih bāt maiñ āp ko sharm dilāne ke lie kahtā hūn. Kyā āp meñ ek bhī sayānā shaḡhs nahīn jo apne bhāiyon ke mābain faislā karne ke qābil ho? ⁶ Lekin nahīn. Bhāi apne hī

bhāi par muqaddamā chalātā hai aur wuh bhī ḡhairīmāndāron ke sāmne.

⁷ Awwal to āp se yih ḡhaltī huī ki āp ek dūsre se muqaddamābāzī karte haiñ. Agar koī āp se nāinsāfi kar rahā ho to kyā behtar nahīñ ki āp use aisā karne deñ? Aur agar koī āp ko ṭhag rahā ho to kyā yih behtar nahīñ ki āp use ṭhagne deñ? ⁸ Is ke baraks āp kā yih hāl hai ki āp ḡhud hī nāinsāfi karte aur ṭhagte haiñ aur wuh bhī apne bhāiyon ko. ⁹ Kyā āp nahīñ jānte ki nāinsāf Allāh kī bādshāhī mīrās meñ nahīñ pāenge? Fareb na khāeñ! Harāmkār, butparast, zinākār, hamjinsparast, laundebāz, ¹⁰ chor, lālchī, sharābī, badzabān, luṭere, yih sab Allāh kī bādshāhī mīrās meñ nahīñ pāenge. ¹¹ Āp meñ se kuchh aise the bhī. Lekin āp ko dhoyā gayā, āp ko muqaddas kiyā gayā, āp ko Ḳhudāwand Īsā Masīh ke nām aur hamāre Ḳhudā ke Rūh se rāstbāz banāyā gayā hai.

Jism Allāh kā Ghar Hai

¹² Mere lie sab kuchh jāyz hai, lekin sab kuchh mufīd nahīñ. Mere lie sab kuchh jāyz to hai, lekin maiñ kisī bhī chīz ko ijāzat nahīñ dūngā ki mujh par hukūmat kare. ¹³ Beshak ḡhurāk peṭ ke lie aur peṭ ḡhurāk ke lie hai, magar Allāh donoñ ko nest kār degā. Lekin ham is se yih natījā nahīñ nikāl sakte ki jism zinākārī ke lie hai. Hargiz nahīñ! Jism Ḳhudāwand ke lie hai aur Ḳhudāwand jism ke lie. ¹⁴ Allāh ne apnī qudrat se Ḳhudāwand Īsā ko zindā kiyā aur isī tarah wuh hamēñ bhī zindā karegā.

¹⁵ Kyā āp nahīn jānte ki āp ke jism Masīh ke āzā haiñ? To kyā main Masīh ke āzā ko le kar fāhishā ke āzā banāūn? Hargiz nahīn. ¹⁶ Kyā āp ko mālūm nahīn ki jo fāhishā se lipaṭ jātā hai wuh us ke sāth ek tan ho jātā hai? Jaise pāk nawishton meñ likhā hai, “Wuh donoñ ek ho jāte haiñ.” ¹⁷ Is ke baraks jo Khudāwand se lipaṭ jātā hai wuh us ke sāth ek rūh ho jātā hai.

¹⁸ Zinākārī se bhāgeñ! Insān se sarzad hone wālā har gunāh us ke jism se bāhar hotā hai siwāe zinā ke. Zinākār to apne hī jism kā gunāh kartā hai. ¹⁹ Kyā āp nahīn jānte ki āp kā badan Rūhul-quds kā ghar hai jo āp ke andar sukūnat kartā hai aur jo āp ko Allāh kī taraf se milā hai? Āp apne mālik nahīn haiñ ²⁰ kyonki āp ko qīmat adā karke kharīdā gayā hai. Ab apne badan se Allāh ko jalāl deñ.

7

Izdiwājī Zindagī

¹ Ab main āp ke sawālāt kā jawāb detā hūn. Beshak achchhā hai ki mard shādī na kare. ² Lekin zinākārī se bachne kī khatir har mard kī apnī bīwī aur har aurat kā apnā shauhar ho. ³ Shauhar apnī bīwī kā haq adā kare aur isī tarah bīwī apne shauhar kā. ⁴ Bīwī apne jism par ikhtiyār nahīn rakhtī balki us kā shauhar. Isī tarah shauhar bhī apne jism par ikhtiyār nahīn rakhtā balki us kī bīwī. ⁵ Chunāñche ek dūsre se judā na hoñ siwāe is ke ki āp donoñ bāhamī razāmandī se ek waqt muqarrar kar leñ tāki duā ke lie zyādā fursat mil sake. Lekin is ke bād āp dubārā ikaṭthe ho jāeñ tāki Iblīs āp ke bezabt

nafs se fāydā uṭhā kar āp ko āzmāish meñ na ḍāle.

⁶ Yih main hukm ke taur par nahīn balki āp ke hālāt ke pesh-e-nazar riāyatan kah rahā hūñ.

⁷ Main chāhtā hūñ ki tamām log mujh jaise hī hoñ. Lekin har ek ko Allāh kī taraf se alag nemat milī hai, ek ko yih nemat, dūsre ko wuh.

Talāq aur Ġhairīmāndār se Shādī

⁸ Main ġhairshādīshudā afrād aur bewāon se yih kahtā hūñ ki achchhā ho agar āp merī tarah ġhairshādīshudā raheñ. ⁹ Lekin agar āp apne āp par qābū na rakh sakeñ to shādī kar leñ. Kyonki is se peshtar ki āp ke shahwānī jazbāt belagām hone lageñ behtar yih hai ki āp shādī kar leñ.

¹⁰ Shādīshudā joṛon ko main nahīn balki Ḳhudāwand hukm detā hai ki biwī apne shauhar se tālluq munqate na kare. ¹¹ Agar wuh aisā kar chukī ho to dūsri shādī na kare yā apne shauhar se sulah kar le. Isī tarah shauhar bhī apnī biwī ko talāq na de.

¹² Dīgar logoñ ko Ḳhudāwand nahīn balki main nasīhat kartā hūñ ki agar kisī imāndār bhāi kī biwī imān nahīn lāī, lekin wuh shauhar ke sāth rahne par rāzī ho to phir wuh apnī biwī ko talāq na de. ¹³ Isī tarah agar kisī imāndār khātūn kā shauhar imān nahīn lāyā, lekin wuh biwī ke sāth rahne par razāmand ho to wuh apne shauhar ko talāq na de. ¹⁴ Kyonki jo shauhar imān nahīn lāyā use us kī imāndār biwī kī mārifat muqaddas ṭhahrāyā gayā hai aur jo biwī imān nahīn lāī use us ke imāndār shauhar kī mārifat muqaddas qarār diyā gayā

hai. Agar aisā na hotā to āp ke bachche nāpāk hote, magar ab wuh muqaddas haiñ. ¹⁵ Lekin agar ġhairīmāndār shauhar yā biwī apnā tālluq munqate kar le to use jāne deñ. Aisī sūrat meñ imāndār bhāī yā bahan is bandhan se āzād ho gae. Magar Allāh ne āp ko sulah-salāmatī kī zindagī guzārne ke lie bulāyā hai. ¹⁶ Bahan, mumkin hai āp apne kḥāwind kī najāt kā bāis ban jāeñ. Yā bhāī, mumkin hai āp apnī biwī kī najāt kā bāis ban jāeñ.

Allāh kī Taraf se Muqarrarā Rāh par Raheñ

¹⁷ Har shaḥs usī rāh par chale jo Ḳhudāwand ne us ke lie muqarrar kī aur us hālat meñ jis meñ Allāh ne use bulāyā hai. Imāndāron kī tamām jamāton ke lie merī yihī hidāyat hai. ¹⁸ Agar kisī ko maḥtūn hālat meñ bulāyā gayā to wuh nāmaḥtūn hone kī koshish na kare. Agar kisī ko nāmaḥtūnī kī hālat meñ bulāyā gayā to wuh apnā khatnā na karwāe. ¹⁹ Na khatnā kuchh chīz hai aur na khatne kā na honā, balki Allāh ke ahkām ke mutābiq zindagī guzārnā hī sab kuchh hai. ²⁰ Har shaḥs usī haisiyat meñ rahe jis meñ use bulāyā gayā thā. ²¹ Kyā āp ġhulām the jab Ḳhudāwand ne āp ko bulāyā? Yih bāt āp ko pareshān na kare. Albattā agar āp ko āzād hone kā mauqā mile to is se zarūr fāydā uṭhāeñ. ²² Kyonki jo us waqt ġhulām thā jab Ḳhudāwand ne use bulāyā wuh ab Ḳhudāwand kā āzād kiyā huā hai. Isī tarah jo āzād thā jab use bulāyā gayā wuh ab Masīh kā ġhulām hai. ²³ Āp ko qīmat de kar kḥarīdā gayā hai, is lie insān ke ġhulām na baneñ. ²⁴ Bhāīyo, har shaḥs jis hālat meñ

bulāyā gayā usī meñ wuh Allāh ke sāmne qāym rahe.

Ġhairshādīshudā Log

²⁵ Kuñwāriyoñ ke bāre meñ mujhe Ḡhudāwand kī taraf se koī ḡhās hukm nahīñ milā. To bhī maiñ jise Allāh ne apnī rahmat se qābil-e-etamād banāyā hai āp par apnī rāy kā izhār kartā hūñ.

²⁶ Merī dānist meñ maujūdā musībat ke pesh-e-nazar insān ke lie achchhā hai ki ḡhairshādīshudā rahe. ²⁷ Agar āp kisī ḡhātūn ke sāth shādī ke bandhan meñ bandh chuke haiñ to phir is bandhan ko toṛne kī koshish na karen. Lekin agar āp shādī ke bandhan meñ nahīñ bandhe to phir is ke lie koshish na karen.

²⁸ Tāham agar āp ne shādī kar hī lī hai to āp ne gunāh nahīñ kiyā. Isī tarah agar kuñwārī shādī kar chukī hai to yih gunāh nahīñ. Magar aise log jismānī taur par musībat meñ paṛ jāenge jabki maiñ āp ko is se bachānā chāhtā hūñ.

²⁹ Bhāiyo, maiñ to yih kahtā hūñ ki waqt thoṛā hai. Āindā shādīshudā aise zindagī basar karen jaise ki ḡhairshādīshudā haiñ. ³⁰ Rone wāle aise hoñ jaise nahīñ ro rahe. Ḡhushī manāne wāle aise hoñ jaise ḡhushī nahīñ manā rahe. Ḡharīdne wāle aise hoñ jaise un ke pās kuchh bhī nahīñ. ³¹ Duniyā se fāydā uṭhāne wāle aise hoñ jaise is kā koī fāydā nahīñ. Kyoñki is duniyā kī maujūdā shakl-o-sūrat ḡhatm hotī jā rahī hai.

³² Maiñ to chāhtā hūñ ki āp fikroñ se āzād raheñ. Ḡhairshādīshudā shakhs Ḡhudāwand ke muāmaloñ kī fikr meñ rahtā hai ki kis tarah

use khush kare. ³³ Is ke baraks shādīshudā shakhs duniyāwī fikr meñ rahtā hai ki kis tarah apnī bīwī ko khush kare. ³⁴ Yoñ wuh barī kash-ma-kash meñ mubtalā rahtā hai. Isī tarah ghairshādīshudā khātūn aur kuñwārī Khudāwand kī fikr meñ rahtī hai ki wuh jismānī aur ruhānī taur par us ke lie maḥsūs-omuqaddas ho. Is ke muqābale meñ shādīshudā khātūn duniyāwī fikr meñ rahtī hai ki apne khāwind ko kis tarah khush kare.

³⁵ Maiñ yih āp hī ke fāyde ke lie kahtā hūñ. Maqsad yih nahīn ki āp par pābandiyān lagāi jāen balki yih ki āp sharāfat, sābitqadmī aur yaksūi ke sāth Khudāwand kī huzūrī meñ chalen.

³⁶ Agar koī samajhtā hai, ‘Maiñ apnī kuñwārī mangetar se shādī na karne se us kā haq mār rahā hūñ’ yā yih ki ‘Merī us ke lie khāhish had se zyādā hai, is lie shādī honī chāhie’ to phir wuh apne irāde ko pūrā kare, yih gunāh nahīn. Wuh shādī kar le. ³⁷ Lekin is ke baraks agar us ne shādī na karne kā pukhtā azm kar liyā hai aur wuh majbūr nahīn balki apne irāde par iḥtiyār rakhtā hai aur us ne apne dil meñ faislā kar liyā hai ki apnī kuñwārī laḥkī ko aise hī rahne de to us ne achchhā kiyā. ³⁸ Gharz jis ne apnī kuñwārī mangetar se shādī kar lī hai us ne achchhā kiyā hai, lekin jis ne nahīn kī us ne aur bhī achchhā kiyā hai.

³⁹ Jab tak khāwind zindā hai bīwī ko us se rishtā toḥne kī ijāzat nahīn. Khāwind kī wafāt ke bād wuh āzād hai ki jis se chāhe shādī kar le, magar sirf Khudāwand meñ. ⁴⁰ Lekin merī

dānist meñ agar wuh aise hī rahe to zyādā mubārak hogī. Aur main samajhtā hūn ki mujh meñ bhī Allāh kā Rūh hai.

8

Butoñ kī Qurbāniyān

¹ Ab main butoñ kī qurbānī ke bāre meñ bāt kartā hūn. Ham jānte haiñ ki ham sab sāhib-e-ilm haiñ. Ilm insān ke phūlne kā bāis bantā hai jabki muhabbat us kī tāmīr kartī hai. ² Jo samajhtā hai ki us ne kuchh jān liyā hai us ne ab tak us tarah nahīn jānā jis tarah us ko jānanā chāhie. ³ Lekin jo Allāh se muhabbat rakhtā hai use Allāh ne jān liyā hai.

⁴ Butoñ kī qurbānī khāne ke zimn meñ ham jānte haiñ ki duniyā meñ but koī chīz nahīn aur ki Rab ke siwā koī aur Ḳhudā nahīn hai. ⁵ Beshak āsmān-o-zamīn par kāī nām-nihād dewatā hote haiñ, hān darasl bahutere dewatāoñ aur Ḳhudāwandoñ kī pūjā kī jātī hai. ⁶ To bhī ham jānte haiñ ki faqt ek hī Ḳhudā hai, hamārā Bāp jis ne sab kuchh paidā kiyā hai aur jis ke lie ham zindagī guzārte haiñ. Aur ek hī Ḳhudāwand hai yānī Īsā Masīh jis ke wasīle se sab kuchh wujūd meñ āyā hai aur jis se hameñ zindagī hāsil hai.

⁷ Lekin har kisī ko is kā ilm nahīn. Bāz imāndār to ab tak yih sochne ke ādī haiñ ki but kā wujūd hai. Is lie jab wuh kisī but kī qurbānī kā gosht khāte haiñ to wuh samajhte haiñ ki ham aisā karne se us but kī pūjā kar rahe haiñ. Yoñ un kā zamīr kamzor hone kī wajah se ālūdā ho jātā hai. ⁸ Haqīqat to yih hai ki hamārā Allāh

ko pasand ānā is bāt par mabnī nahīn ki ham kyā khāte haiñ aur kyā nahīn khāte. Na parhez karne se hameñ koī nuqsān pahuñchtā hai aur na khā lene se koī faydā.

⁹ Lekin khabardār raheñ ki āp kī yih āzādī kamzoroñ ke lie t̥hokar kā bāis na bane. ¹⁰ Kyoñki agar koī kamzorzamīr shaḡhs āp ko butk̥hāne meñ khānā khāte hue dekhe to kyā use us ke zamīr ke k̥hilāf butoñ kī qurbāniyāñ khāne par ubhārā nahīn jāegā? ¹¹ Is tarah āp kā kamzor bhāī jis kī k̥hātir Masīh qurbān huā āp ke ilm-o-irfān kī wajah se halāk ho jāegā. ¹² Jab āp is tarah apne bhāiyōñ kā gunāh karte aur un ke kamzor zamīr ko majrūh karte haiñ to āp Masīh kā hī gunāh karte haiñ. ¹³ Is lie agar aisā khānā mere bhāī ko sahīh rāh se bhatkāne kā bāis bane to maiñ kabhī gosht nahīn khāūngā tāki apne bhāī kī gumrāhī kā bāis na banūñ.

9

Rasūl kā Haq

¹ Kyā maiñ āzād nahīn? Kyā maiñ Masīh kā rasūl nahīn? Kyā maiñ ne Īsā ko nahīn dekhā jo hamārā Khudāwand hai? Kyā āp Khudāwand meñ merī mehnat kā phal nahīn haiñ? ² Agarche maiñ dūsroñ ke nazdik Masīh kā rasūl nahīn, lekin āp ke nazdik to zarūr hūñ. Khudāwand meñ āp hī merī risālat par muhr haiñ.

³ Jo merī bāzpurs karnā chāhte haiñ unheñ maiñ apne difā meñ kahtā hūñ, ⁴ kyā hameñ khāne-pīne kā haq nahīn? ⁵ Kyā hameñ haq nahīn ki shādī karke apnī bīwī ko sāth lie

phireñ? Dūsre rasūl aur Ḳhudāwand ke bhāi aur Kaifā to aisā hī karte haiñ. ⁶ Kyā mujhe aur Barnabās hī ko apnī ḳhidmat ke ajr meñ kuchh pāne kā haq nahīñ? ⁷ Kaun-sā faujī apne ḳharch par jang laṛtā hai? Kaun angūr kā bāgh lagā kar us ke phal se apnā hissā nahīñ pātā? Yā kaun rewar kī gallābānī karke us ke dūdh se apnā hissā nahīñ pātā?

⁸ Kyā main yih faqt insānī soch ke taht kah rahā hūñ? Kyā sharīat bhī yihī nahīñ kahtī? ⁹ Tauret meñ likhā hai, “Jab tū fasal gāhne ke lie us par bail chalne detā hai to us kā muñh bāndh kar na rakhnā.” Kyā Allāh sirf bailon kī fikr kartā hai ¹⁰ yā wuh hamārī ḳhātir yih farmātā hai? Hāñ, zarūr hamārī ḳhātir kyonki hal chalāne wālā is ummīd par chalātā hai ki use kuchh milegā. Isī tarah gāhne wālā is ummīd par gāhtā hai ki wuh paidāwār meñ se apnā hissā pāegā. ¹¹ Ham ne āp ke lie ruhānī bij boyā hai. To kyā yih nāmūnāsib hai agar ham āp se jismānī fasal kāṭeñ? ¹² Agar dūsroñ ko āp se apnā hissā lene kā haq hai to kyā hamārā un se zyādā haq nahīñ bantā?

Lekin ham ne is haq se fāydā nahīñ uṭhāyā. Ham sab kuchh bardāshht karte haiñ tāki Masīh kī ḳhushḳhabrī ke lie kisī bhī tarah se rukāwaṭ kā bāis na baneñ. ¹³ Kyā āp nahīñ jānte ki Baitul-muqaddas meñ ḳhidmat karne wālon kī zarūriyāt Baitul-muqaddas hī se pūrī kī jāti haiñ? Jo qurbāniyāñ chaṛhāne ke kām meñ masrūf rahte haiñ unheñ qurbāniyon se hī hissā miltā hai. ¹⁴ Isī tarah Ḳhudāwand ne muqarrar kiyā hai ki injīl kī ḳhushḳhabrī kī munādī karne

wāloñ kī zarūriyāt un se pūrī kī jāeñ jo is k̄hidmat se fāydā uṭhāte haiñ.

¹⁵ Lekin maiñ ne kisī tarah bhī is se fāydā nahīñ uṭhāyā, aur na is lie likhā hai ki mere sāth aisā sulūk kiyā jāe. Nahīñ, is se pahle ki faḡhr karne kā merā yih haq mujh se chhīn liyā jāe behtar yih hai ki maiñ mar jāūñ. ¹⁶ Lekin Allāh kī k̄hushk̄habrī kī munādī karnā mere lie faḡhr kā bāis nahīñ. Maiñ to yih karne par mājbūr hūñ. Mujh par afsos agar is k̄hushk̄habrī kī munādī na karūñ. ¹⁷ Agar maiñ yih apnī marzī se kartā to phir ajr kā merā haq bantā. Lekin aisā nahīñ hai balki K̄hudā hī ne mujhe yih zimmedārī dī hai. ¹⁸ To phir merā ajr kyā hai? Yih ki maiñ injīl kī k̄hushk̄habrī muft sunāūñ aur apne us haq se fāydā na uṭhāūñ jo mujhe us kī munādī karne se hāsil hai.

¹⁹ Agarche maiñ sab logoñ se āzād hūñ phir bhī maiñ ne apne āp ko sab kā ḡhulām banā liyā tāki zyādā se zyādā logoñ ko jīt lūñ. ²⁰ Maiñ Yahūdīyon ke darmiyān Yahūdī kī mānind banā tāki Yahūdīyon ko jīt lūñ. Mūsawī shariyat ke taht zindagī guzārne wāloñ ke darmiyān maiñ un kī mānind banā tāki unheñ jīt lūñ, go maiñ shariyat ke mātaht nahīñ. ²¹ Mūsawī shariyat ke baḡhair zindagī guzārne wāloñ ke darmiyān maiñ unheñ kī mānind banā tāki unheñ jīt lūñ. Is kā matlab yih nahīñ ki maiñ Allāh kī shariyat ke tābe nahīñ hūñ. Haqīqat meñ maiñ Masīh kī shariyat ke taht zindagī guzartā hūñ. ²² Maiñ kamzoroñ ke lie kamzor banā tāki unheñ jīt lūñ. Sab ke lie maiñ sab kuchh banā tāki har mumkin tarīqe se bāz ko bachā sakūñ. ²³ Jo kuchh bhī kartā hūñ Allāh

kī khushkhabrī ke wāste kartā hūn tāki is kī barakāt meñ sharīk ho jāūn.

²⁴ Kyā āp nahīn jānte ki šeḍiyam meñ daurte to sab hī haiñ, lekin inām ek hī shaḅhs hāsil kartā hai? Chunāñche aise daureñ ki āp hī jiteñ.

²⁵ Kheloñ meñ sharīk hone wālā har shaḅhs apne āp ko saḅht nazm-o-zabt kā pāband rakhtā hai. Wuh fānī tāj pāne ke lie aisā karte haiñ, lekin ham ḡhairfānī tāj pāne ke lie. ²⁶ Chunāñche maiñ har waqt manzil-e-maqsūd ko pesh-e-nazar rakhte hue daurtā hūn. Aur maiñ isī tarah bāksing bhī kartā hūn, maiñ hawā meñ mukke nahīn märtā balki nishāne ko. ²⁷ Maiñ apne badan ko märtā kūtṭā aur ise apnā ḡhulām banātā hūn, aisā na ho ki dūsron meñ munādī karke khud nāmaqbul ṭhahrūn.

10

Isrāil kā Ibratnāk Tajrabā

¹ Bhāiyo, maiñ nahīn chāhtā ki āp is bāt se nāwāqif raheñ ki hamāre bāpdādā sab bādāl ke nīche the. Wuh sab samundar meñ se guzare.

² Un sab ne bādāl aur samundar meñ Mūsā kā baptismā liyā. ³ Sab ne ek hī ruhānī khurāk khāi

⁴ aur sab ne ek hī ruhānī pānī piyā. Kyoñki Masīh ruhānī Chaṭān kī sūrat meñ un ke sāth sāth chaltā rahā aur wuhī un sab ko pānī pilātā rahā. ⁵ Is ke bāwujūd un meñ se beshtar log Allāh ko pasand na āe, is lie wuh registān meñ halāk ho gae.

⁶ Yih sab kuchh hamārī ibrat ke lie wāqe huā tāki ham un logoñ kī tarah burī chīzoñ kī hawas na kareñ. ⁷ Un meñ se bāz kī tarah butparast na

baneñ, jaise muqaddas nawishton meñ likhā hai, “Log khāne-pīne ke lie baiṭh gae aur phir uṭh kar rangraliyon meñ apne dil bahlāne lage.” ⁸ Ham zinā bhī na karen jaise un meñ se bāz ne kiyā aur natije meñ ek hī din meñ 23,000 afrād dher ho gae. ⁹ Ham Ḳhudāwand kī āzmāish bhī na karen jis tarah un meñ se bāz ne kī aur natije meñ sānpon se halāk hue. ¹⁰ Aur na burburāen jis tarah un meñ se bāz burburāne lage aur natije meñ halāk karne wāle farishte ke hāthon māre gae.

¹¹ Yih mājare ibrat kī khātir un par wāqe hue aur ham Aḳhīr zamāne meñ rahne wālon kī nasīhat ke lie likhe gae.

¹² Ġharz jo samajhtā hai ki wuh mazbūtī se kharā hai, ḳhabardār rahe ki gir na parē. ¹³ Āp sirf aisī āzmāishon meñ parē haiñ jo insān ke lie ām hotī haiñ. Aur Allāh wafādār hai. Wuh āp ko āp kī tāqat se zyādā āzmāish meñ nahīn parne degā. Jab āp āzmāish meñ par jaeñge to wuh us meñ se nikalne kī rāh bhī paidā kar degā tāki āp use bardāsht kar sakeñ.

Ashā-e-Rabbānī aur Butparastī meñ Tazād

¹⁴ Ġharz mere pyāro, butparastī se bhāgeñ. ¹⁵ Maiñ āp ko samajhdār jān kar bāt kar rahā hūñ. Āp ḳhud merī is bāt kā faislā karen. ¹⁶ Jab ham Ashā-e-Rabbānī ke mauqe par barkat ke pyāle ko barkat de kar us meñ se pīte haiñ to kyā ham yoñ Masīh ke ḳhūn meñ sharīk nahīn hote? Aur jab ham roṭī toṛ kar khāte haiñ to kyā Masīh ke badan meñ sharīk nahīn hote? ¹⁷ Roṭī to ek hī

hai, is lie ham jo bahut-se haiñ ek hī badan haiñ, kyonki ham sab ek hī roṭī meñ sharīk hote haiñ.

¹⁸ Banī Isrāīl par ḡhaur karen. Kyā Baitul-muqaddas meñ qurbāniyāñ khāne wāle qurbāngāh kī rifāqat meñ sharīk nahīñ hote? ¹⁹ Kyā main yih kahnā chāhtā hūñ ki buton ke chaṛhāwe kī koī haisiyat hai? Yā ki but kī koī haisiyat hai? Hargiz nahīñ. ²⁰ Main yih kahtā hūñ ki jo qurbāniyāñ wuh guzarānte haiñ Allāh ko nahīñ balki shayātīn ko guzarānte haiñ. Aur main nahīñ chāhtā ki āp shayātīn kī rifāqat meñ sharīk hoñ. ²¹ Āp Ḳhudāwand ke pyāle aur sāth hī shayātīn ke pyāle se nahīñ pī sakte. Āp Ḳhudāwand ke rifāqatī khāne aur sāth hī shayātīn ke rifāqatī khāne meñ sharīk nahīñ ho sakte. ²² Yā kyā ham Allāh kī ḡhairat ko uksānā chāhte haiñ? Kyā ham us se tāqatwar haiñ?

Dūsron ke Zamīr kā Lihāz Karnā

²³ Sab kuchh rawā to hai, lekin sab kuchh mufīd nahīñ. Sab kuchh jāyz to hai, lekin sab kuchh hamārī tāmīr-o-taraqquī kā bāis nahīñ hotā. ²⁴ Har koī apne hī fāyde kī talāsh meñ na rahe balki dūsre ke.

²⁵ Bāzār meñ jo kuchh biktā hai use khāeñ aur apne zamīr ko mutma'in karne kī ḡhātīr pūchh-gachh na karen, ²⁶ kyonki “Zamīn aur jo kuchh us par hai Rab kā hai.”

²⁷ Agar koī ḡhairīmāndār āp kī dāwat kare aur āp us dāwat ko qabūl kar leñ to āp ke sāmne jo kuchh bhī rakhā jāe use khāeñ. Apne zamīr ke itmīnān ke lie taftūsh na karen. ²⁸ Lekin agar koī āp ko batā de, “Yih buton kā chaṛhāwā hai” to

phir us shaḥs kī ḳhātir jis ne āp ko āgāh kiyā hai aur zamīr kī ḳhātir use na ḳhāēn. ²⁹ Matlab hai apne zamīr kī ḳhātir nahīn balki dūsre ke zamīr kī ḳhātir. Kyoṅki yih kis tarah ho saktā hai ki kisī dūsre kā zamīr merī āzādī ke bāre meṅ faislā kare? ³⁰ Agar main Ḳhudā kā shukr karke kisī khāne meṅ sharīk hotā hūn to phir mujhe kyoṅ burā kahā jāe? Main to use Ḳhudā kā shukr karke ḳhātā hūn.

³¹ Chunānche sab kuchh Allāh ke jalāl kī ḳhātir karen, ḳhāh āp ḳhāēn, piēn yā aur kuchh karen. ³² Kisī ke lie ṭhokar kā bāis na baneṅ, na Yahūdīyon ke lie, na Yūnānīyon ke lie aur na Allāh kī jamāt ke lie. ³³ Isī tarah main bhī sab ko pasand āne kī har mumkin koshish kartā hūn. Main apne hī fāyde ke ḳhayāl meṅ nahīn rahtā balki dūsron ke tāki bahutere najāt pāēn.

11

¹ Mere namūne par chalen jis tarah main Masīh ke namūne par chaltā hūn.

Ibādat meṅ Ḳhawātīn kā Kirdār

² Shābāsh ki āp har tarah se mujhe yād rakhte haiṅ. Āp ne riwāyāt ko yoṅ mahfūz rakhā hai jis tarah main ne unheṅ āp ke sapurd kiyā thā. ³ Lekin main āp ko ek aur bāt se āgāh karnā chāhtā hūn. Har mard kā sar Masīh hai jabki aurat kā sar mard aur Masīh kā sar Allāh hai. ⁴ Agar koī mard sar ḍhānk kar duā yā nabuwwat kare to wuh apne sar kī be'izzatī kartā hai. ⁵ Aur agar koī ḳhātūn nange sar duā yā nabuwwat kare to wuh apne sar kī be'izzatī kartī hai, goyā wuh sar munḍī hai. ⁶ Jo aurat apne sar

par dopaṭṭā nahīn letī wuh ṭiṇḍ karwāe. Lekin agar ṭiṇḍ karwānā yā sar munḍwānā us ke lie be'izzatī kā bāis hai to phir wuh apne sar ko zarūr ḍhānke. ⁷ Lekin mard ke lie lāzim hai ki wuh apne sar ko na ḍhānke kyoṅki wuh Allāh kī sūrat aur jalāl ko mun'akis kartā hai. Lekin aurat mard kā jalāl mun'akis kartī hai, ⁸ kyoṅki pahlā mard aurat se nahīn niklā balki aurat mard se niklī hai. ⁹ Mard ko aurat ke lie ḳhalaq nahīn kiyā gayā balki aurat ko mard ke lie. ¹⁰ Is wajah se aurat farishton ko pesh-e-nazar rakh kar apne sar par dopaṭṭā le jo us par iḳhtiyār kā nishān hai. ¹¹ Lekin yād rahe ki Ḳhudāwand meṅ na aurat mard ke baḡhair kuchh hai aur na mard aurat ke baḡhair. ¹² Kyoṅki agarche ibtidā meṅ aurat mard se niklī, lekin ab mard aurat hī se paidā hotā hai. Aur har shai Allāh se nikaltī hai.

¹³ Āp ḳhud faislā kareṅ. Kyā munāsib hai ki koī aurat Allāh ke sāmne nange sar duā kare? ¹⁴ Kyā fitrat bhī yih nahīn sikhātī ki lambe bāl mard kī be'izzatī kā bāis haiṅ ¹⁵ jabki aurat ke lambe bāl us kī izzat kā mūjib haiṅ? Kyoṅki bāl use ḍhānpne ke lie die gae haiṅ. ¹⁶ Lekin is silsile meṅ agar koī jhagarne kā shauḳ rakhe to jān le ki na hamārā yih dastūr hai, na Allāh kī jamāton kā.

Ashā-e-Rabbānī

¹⁷ Main āp ko ek aur hidāyat detā hūn. Lekin is silsile meṅ mere pās āp ke lie tārifī alfāz nahīn, kyoṅki āp kā jamā honā āp kī behtarī kā bāis nahīn hotā balki nuqsān kā bāis. ¹⁸ Awwal to main suntā hūn ki jab āp jamāt kī sūrat meṅ

ikaṭṭhe hote haiṅ to āp ke darmiyān pārtībāzī nazar ātī hai. Aur kisī had tak mujhe is kā yaqīn bhī hai. ¹⁹ Lāzim hai ki āp ke darmiyān muḁhtalif pārtiyān nazar āeṅ tāki āp meṅ se wuh zāhir ho jāeṅ jo āzmāne ke bād bhī sachche nikleṅ. ²⁰ Jab āp jamā hote haiṅ to jo khānā āp khāte haiṅ us kā Ashā-e-Rabbānī se koī tālluq nahīn rahā. ²¹ Kyoṅki har shaḁhs dūsroṅ kā intazār kie baḁhair apnā khānā khāne lagtā hai. Natīje meṅ ek bhūkā rahtā hai jabki dūsre ko nashā ho jātā hai. ²² Tājjub hai! Kyā khāne-pīne ke lie āp ke ghar nahīn? Yā kyā āp Allāh kī jamāt ko haqīr jān kar un ko jo khāli hāth āe haiṅ sharmindā karnā chāhte haiṅ? Maiṅ kyā kahūṅ? Kyā āp ko shābāsh dūṅ? Is meṅ maiṅ āp ko shābāsh nahīn de saktā.

²³ Kyoṅki jo kuchh maiṅ ne āp ke sapurd kiyā hai wuh mujhe Ḵhudāwand hī se milā hai. Jis rāt Ḵhudāwand Isā ko dushman ke hawāle kar diyā gayā us ne roṭī le kar ²⁴ shukrguzārī kī duā kī aur use ṭukre karke kahā, “Yih merā badan hai jo tumhāre lie diyā jātā hai. Mujhe yād karne ke lie yihī kiyā karo.” ²⁵ Isī tarah us ne khāne ke bād pyālā le kar kahā, “Mai kā yih pyālā wuh nayā ahd hai jo mere khūn ke zariye qāym kiyā jātā hai. Jab kabhī ise piyo to mujhe yād karne ke lie piyo.” ²⁶ Kyoṅki jab bhī āp yih roṭī khāte aur yih pyālā pīte haiṅ to Ḵhudāwand kī maut kā elān karte haiṅ, jab tak wuh wāpas na āe.

²⁷ Chunānche jo nālāyq taur par Ḵhudāwand kī roṭī khāe aur us kā pyālā pie wuh Ḵhudāwand ke badan aur khūn kā gunāh kartā hai aur

qusūrwar ṭahregā. ²⁸ Har shaḥs apne āp ko parakh kar hī is roṭī meñ se khāe aur pyāle meñ se pie. ²⁹ Jo roṭī khāte aur pyālā pīte waqt Ḳhudāwand ke badan kā ehtirām nahīn kartā wuh apne āp par Allāh kī adālat lātā hai. ³⁰ Isī lie āp ke darmiyān bahutere kamzor aur bīmār haiñ balki bahut-se maut kī nīnd so chuke haiñ. ³¹ Agar ham apne āp ko jānchte to Allāh kī adālat se bache rahte. ³² Lekin Ḳhudāwand hamārī adālat karne se hamārī tarbiyat kartā hai tāki ham duniyā ke sāth mujrim na ṭahreñ.

³³ Ġharz mere bhāiyo, jab āp khāne ke lie jamā hote haiñ to ek dūsre kā intazār karen. ³⁴ Agar kisī ko bhūk lagī ho to wuh apne ghar meñ hī khānā khā le tāki āp kā jamā honā āp kī adālat kā bāis na ṭahre. Dīgar hidāyat maiñ āp ko us waqt dūngā jab āp ke pās āūngā.

12

Ek Rūh aur Mukhtalif Nemateñ

¹ Bhāiyo, maiñ nahīn chāhtā ki āp ruhānī nematoñ ke bāre meñ nāwāqif raheñ. ² Āp jānte haiñ ki īmān lāne se peshtar āp ko bār bār bahkāyā aur gūnge butoñ kī taraf khīnchā jātā thā. ³ Isī ke pesh-e-nazar maiñ āp ko āgāh kartā hūñ ki Allāh ke Rūh kī hidāyat se bolne wālā kabhī nahīn kahegā, “Īsā par lānat.” Aur Rūhul-quds kī hidāyat se bolne wāle ke siwā koī nahīn kahegā, “Īsā Ḳhudāwand hai.”

⁴ Go tarah tarah kī nemateñ hotī haiñ, lekin Rūh ek hī hai. ⁵ Tarah tarah kī Ḳhidmateñ hotī haiñ, lekin Ḳhudāwand ek hī hai. ⁶ Allāh apnī

qudrat kā izhār muḵhtalif andāz se kartā hai, lekin Ḳhudā ek hī hai jo sab meñ har tarah kā kām kartā hai. ⁷ Ham meñ se har ek meñ Rūhul-quds kā izhār kisī nemat se hotā hai. Yih nemateñ is lie dī jātī haiñ tāki ham ek dūsre kī madad kareñ. ⁸ Ek ko Rūhul-quds hikmat kā kalām atā kartā hai, dūsre ko wuhī Rūh ilm-o-irfān kā kalām. ⁹ Tisre ko wuhī Rūh puḵhtā imān detā hai aur chauthē ko wuhī ek Rūh shifā dene kī nemateñ. ¹⁰ Wuh ek ko mojize karne kī tāqat detā hai, dūsre ko nabuwwat karne kī salāhiyat aur tisre ko muḵhtalif rūhoñ meñ imtiyāz karne kī nemat. Ek ko us se ḡhairzabāneñ bolne kī nemat miltī hai aur dūsre ko in kā tarjumā karne kī. ¹¹ Wuhī ek Rūh yih tamām nemateñ taq̄sīm kartā hai. Aur wuhī faislā kartā hai ki kis ko kyā nemat milnī hai.

Ek Jism aur Muḵhtalif Āzā

¹² Insānī jism ke bahut-se āzā hote haiñ, lekin yih tamām āzā ek hī badan ko tashkīl dete haiñ. Masīh kā badan bhī aisā hai. ¹³ Ḳhāh ham Yahūdī the yā Yūnānī, ḡhulām the yā āzād, bap̄tisme se ham sab ko ek hī Rūh kī mārifat ek hī badan meñ shāmil kiyā gayā hai, ham sab ko ek hī Rūh pilāyā gayā hai.

¹⁴ Badan ke bahut-se hisse hote haiñ, na sirf ek. ¹⁵ Farz kareñ ki pāñw kahe, “Maiñ hāth nahīñ hūñ is lie badan kā hissā nahīñ.” Kyā yih kahne par us kā badan se tālluḡ ḡhatm ho jāegā? ¹⁶ Yā farz kareñ ki kāñ kahe, “Maiñ āñkh nahīñ hūñ is lie badan kā hissā nahīñ.” Kyā yih kahne par us kā badan se nātā ṭuṭ jāegā? ¹⁷ Agar pūrā jism āñkh hī hotā to phir sunane kī salāhiyat

kahān hotī? Agar sārā badan kān hī hotā to phir sūnghne kā kyā bantā? ¹⁸ Lekin Allāh ne jism ke muḳhtalif āzā banā kar har ek ko wahān lagāyā jahān wuh chāhtā thā. ¹⁹ Agar ek hī azu pūrā jism hotā to phir yih kis qism kā jism hotā? ²⁰ Nahīn, bahut-se āzā hote haiñ, lekin jism ek hī hai.

²¹ Āñkh hāth se nahīn kah saktī, “Mujhe terī zarūrat nahīn,” na sar pāñwoñ se kah saktā hai, “Mujhe tumhārī zarūrat nahīn.” ²² Balki agar dekhā jāe to aksar aisā hotā hai ki jism ke jo āzā zyādā kamzor lagte haiñ un kī zyādā zarūrat hotī hai. ²³ Wuh āzā jinheñ ham kam izzat ke lāyq samajhte haiñ unheñ ham zyādā izzat ke sāth dhāñp lete haiñ, aur wuh āzā jinheñ ham sharm se chhupā kar rakhte haiñ unhīn kā ham zyādā ehtirām karte haiñ. ²⁴ Is ke baraks hamāre izzatdār āzā ko is kī zarūrat hī nahīn hotī ki ham un kā ḳhās ehtirām karen. Lekin Allāh ne jism ko is tarah tartīb diyā ki us ne kamqadar āzā ko zyādā izzatdār ṭhahrāyā, ²⁵ tāki jism ke āzā meñ tafriqā na ho balki wuh ek dūsre kī fikr karen. ²⁶ Agar ek azu dukh meñ ho to us ke sāth dīgar tamām āzā bhī dukh mahsūs karte haiñ. Agar ek azu sarfarāz ho jāe to us ke sāth bāqī tamām āzā bhī masrūr hote haiñ.

²⁷ Āp sab mil kar Masīh kā badan haiñ aur infirādī taur par us ke muḳhtalif āzā. ²⁸ Aur Allāh ne apnī jamāt meñ pahle rasūl, dūsre nabī aur tīsre ustād muqarrar kie haiñ. Phir us ne aise log bhī muqarrar kie haiñ jo mojize karte, shifā dete, dūsroñ kī madad karte, intazām chalāte aur muḳhtalif qism kī ḡhairzabāneñ

bolte haiñ. ²⁹ Kyā sab rasūl haiñ? Kyā sab nabī haiñ? Kyā sab ustād haiñ? Kyā sab mojize karte haiñ? ³⁰ Kyā sab ko shifā dene kī nemateñ hāsil haiñ? Kyā sab ḡhairzabāneñ bolte haiñ? Kyā sab in kā tarjumā karte haiñ? ³¹ Lekin āp un nematoñ kī talāsh meñ raheñ jo afzal haiñ.

Ab maiñ āp ko is se kahiñ umdā rāh batātā hūñ.

13

Muhabbat

¹ Agar maiñ insānoñ aur farishtoñ kī zabāneñ bolūñ, lekin muhabbat na rakhūñ to phir maiñ bas gūñjtā huā ḡharīyāl yā ṭaṭṭanātī huī jhāñjh hī hūñ. ² Agar merī nabuwwat kī nemat ho aur mujhe tamām bhedoñ aur har ilm se wāqifiyat ho, sāth hī merā aisā imān ho ki paharoñ ko khiskā sakūñ, lekin merā dil muhabbat se ḡhālī ho to maiñ kuchh bhī nahīñ. ³ Agar maiñ apnā sārā māl ḡharīboñ meñ taqsīm kar dūñ balki apnā badan jalāe jāne ke lie de dūñ, lekin merā dil muhabbat se ḡhālī ho to mujhe kuchh fāydā nahīñ. ⁴ Muhabbat sabar se kām letī hai, muhabbat mehrbān hai. Na yih hasad kartī hai na ḡīngeñ mārtī hai. Yih phūltī bhī nahīñ.

⁵ Muhabbat badtamīzī nahīñ kartī na apne hī fāyde kī talāsh meñ rahtī hai. Yih jaldī se ḡhusse meñ nahīñ ā jātī aur dūsroñ kī ḡhaltiyon kā rikārd nahīñ rakhtī. ⁶ Yih nāinsāfi dekh kar ḡhush nahīñ hotī balki sachchāī ke ḡhālib āne par hī ḡhushī manātī hai. ⁷ Yih hameshā dūsroñ kī kamzoriyān bardāsht kartī

hai, hameshā etamād kartī hai, hameshā ummīd rakhtī hai, hameshā sābitqadam rahtī hai.

⁸ Muhabbat kabhī khatm nahīn hotī. Is ke muqābale meñ nabuwwatēñ khatm ho jāēngī, ġhairzabāneñ jāti raheñgī, ilm miṭ jāegā.

⁹ Kyonki is waqt hamārā ilm nāmukammal hai aur hamārī nabuwwat sab kuchh zāhir nahīn kartī. ¹⁰ Lekin jab wuh kuchh āegā jo kāmīl hai to yih adhūrī chīzeñ jāti raheñgī. ¹¹ Jab main bachchā thā to bachche kī tarah boltā, bachche kī-sī soch rakhtā aur bachche kī-sī samajh se kām letā thā. Lekin ab main bālīgh hūñ, is lie main ne bachche kā-sā andāz chhoṛ diyā hai. ¹² Is waqt hameñ āīne meñ dhundlā-sā dikhāi detā hai, lekin us waqt ham rūbarū dekheñge. Ab main juzwī taur par jāntā hūñ, lekin us waqt kāmīl taur se jāñ lūngā, aise hī jaise Allāh ne mujhe pahle se jāñ liyā hai.

¹³ Ġharz īmān, ummīd aur muhabbat tīnoñ qāym rahte haiñ, lekin in meñ afzal muhabbat hai.

14

Nabuwwat aur Ġhairzabāneñ

¹ Muhabbat kā dāman thāme rakheñ. Lekin sāth hī ruhānī nematoñ ko sargarmī se istemāl meñ lāeñ, khusūsan nabuwwat kī nemat ko.

² Ġhairzabān bolne wālā logoñ se nahīn balki Allāh se bāt kartā hai. Koī us kī bāt nahīn samajhtā kyonki wuh Rūh meñ bhed kī bāteñ kartā hai. ³ Is ke baraks nabuwwat karne wālā logoñ se aisī bāteñ kartā hai jo un kī tāmīr-otaraqqī, hauslā-afzāi aur tasallī kā bāis banti

haiñ. ⁴ Ġhairzabān bolne wālā apñī tāmīr-o-taraqqī kartā hai jabki nabuwwat karne wālā jamāt kī.

⁵ Maiñ chāhtā hūñ ki āp sab Ġhairzabāneñ boleñ, lekin is se zyādā yih k̄hāhish rakhtā hūñ ki āp nabuwwat karen. Nabuwwat karne wālā Ġhairzabāneñ bolne wāle se aham hai. Hāñ, Ġhairzabāneñ bolne wālā bhī aham hai basharteki apñī zabān kā tarjumā kare, kyoñki is se K̄hudā kī jamāt kī tāmīr-o-taraqqī hotī hai.

⁶ Bhāiyo, agar maiñ āp ke pās ā kar Ġhairzabāneñ bolūñ, lekin mukāshafe, ilm, nabuwwat aur tālīm kī koī bāt na karūñ to āp ko kyā faydā hogā? ⁷ Bejān sāzoñ par Ġhaur karne se bhī yihī bāt sāmne ātī hai. Agar bāñsrī yā sarod ko kisī k̄hās sur ke mutābiq na bajāyā jāe to phir sunane wāle kis tarah pahchān sakeñge ki in par kyā kyā pesh kiyā jā rahā hai? ⁸ Isī tarah agar bigul kī āwāz jang ke lie taiyār ho jāne ke lie sāf taur se na baje to kyā faujī kamarbastā ho jāeñge? ⁹ Agar āp sāf sāf bāt na karen to āp kī hālat bhī aisī hī hogī. Phir āp kī bāt kaun samjhegā? Kyoñki āp logoñ se nahīñ balki hawā se bāteñ kareñge. ¹⁰ Is duniyā meñ bahut zyādā zabāneñ bolī jātī haiñ aur in meñ se koī bhī nahīñ jo bemānī ho. ¹¹ Agar maiñ kisī zabān se wāqif nahīñ to maiñ us zabān meñ bolne wāle ke nazdīk ajnabī ṭhahrūnga aur wuh mere nazdīk. ¹² Yih usūl āp par bhī lāgū hotā hai. Chūñki āp ruhānī nematoñ ke lie tarapte haiñ to phir k̄hāskar un nematoñ meñ māhir banane kī koshish karen jo K̄hudā kī jamāt ko tāmīr kartī haiñ.

¹³ Chunānche ġhairzabān bolne wālā duā kare ki is kā tarjumā bhī kar sake. ¹⁴ Kyoñki agar main ġhairzabān meñ duā karūñ to merī rūh to duā kartī hai magar merī aql beamal rahtī hai. ¹⁵ To phir kyā karūñ? Main Rūh meñ duā karūñga, lekin aql ko bhī istemāl karūñga. Main Rūh meñ hamd-o-sanā karūñga, lekin aql ko bhī istemāl meñ lāūngā. ¹⁶ Agar āp sirf Rūh meñ hamd-o-sanā karen to hāzirīn meñ se jo āp kī bāt nahīñ samajhtā wuh kis tarah āp kī shukrguzārī par “Āmīn” kah sakegā? Use to āp kī bātoñ kī samajh hī nahīñ āī. ¹⁷ Beshak āp achchhī tarah Ḳhudā kā shukr kar rahe hoñge, lekin is se dūsre shaḡhs kī tāmīr-o-taraqqī nahīñ hogī.

¹⁸ Main Ḳhudā kā shukr kartā hūñ ki āp sab kī nisbat zyādā ġhairzabānoñ meñ bāt kartā hūñ. ¹⁹ Phir bhī main Ḳhudā kī jamāt meñ aisī bāteñ pesh karnā chāhtā hūñ jo dūsre samajh sakeñ aur jin se wuh tarbiyat hāsil kar sakeñ. Kyoñki ġhairzabānoñ meñ bolī gaī beshumār bātoñ kī nisbat pāñch tarbiyat dene wāle alfāz kahīñ behtar haiñ.

²⁰ Bhāiyo, bachchoñ jaisī soch se bāz aeñ. Burāī ke lihāz se to zarūr bachche bane raheñ, lekin samajh meñ bālīgh ban jāeñ. ²¹ Sharīat meñ likhā hai, “Rab farmātā hai ki main ġhairzabānoñ aur ajnabiyōñ ke hoñtoñ kī mārīfat is qaum se bāt karūñga. Lekin wuh phir bhī merī nahīñ suneñge.” ²² Is se zāhir hotā hai ki ġhairzabāneñ imāndāroñ ke lie imtiyāzī nishān nahīñ hotīñ balki ġhairīmāndāroñ ke lie. Is ke baraks nabuwwat ġhairīmāndāroñ ke lie imtiyāzī nishān nahīñ hotī balki imāndāroñ ke

lie.

²³ Ab farz karen ki imāndār ek jagah jamā haiñ aur tamām hāzirīn ḡhairzabāneñ bol rahe haiñ. Isī asnā meñ ḡhairzabān ko na samajhne wāle yā ḡhairimāndār ā shāmil hote haiñ. Āp ko is hālat meñ dekh kar kyā wuh āp ko dīwānā qarār nahīn deñge? ²⁴ Is ke muqābale meñ agar tamām log nabuwwat kar rahe hoñ aur koī ḡhairimāndār andar āe to kyā hogā? Wuh sab use qāyl kar leñge ki gunāhgār hai aur sab use parakh leñge. ²⁵ Yoñ us ke dil kī poshīdā bāteñ zāhir ho jāeñgī, wuh gir kar Allāh ko sijdā karegā aur taslīm karegā ki filhaqīqat Allāh āp ke darmiyān maujūd hai.

Jamāt meñ Tartīb kī Zarūrat

²⁶ Bhāiyo, phir kyā honā chāhie? Jab āp jamā hote haiñ to har ek ke pās koī gīt yā tālim yā mukāshafā yā ḡhairzabān yā is kā tarjumā ho. In sab kā maqsad Ḳhudā kī jamāt kī tāmīr-otaraqqī ho. ²⁷ Ḡhairzabān meñ bolte waqt sirf do yā zyādā se zyādā tīn ashkhās boleñ aur wuh bhī bārī bārī. Sāth hī koī un kā tarjumā bhī kare. ²⁸ Agar koī tarjumā karne wālā na ho to ḡhairzabān bolne wālā jamāt meñ khāmosh rahe, albattā use apne āp se aur Allāh se bāt karne kī āzādī hai. ²⁹ Nabiyon meñ se do yā tīn nabuwwat karen aur dūsre un kī bāton kī sehhat ko parkheñ. ³⁰ Agar is daurān kisī baiṭhe hue shakhs ko koī mukāshafā mile to pahlā shakhs khāmosh ho jāe. ³¹ Kyoñki āp sab bārī bārī nabuwwat kar sakte haiñ tāki tamām log sikhēñ aur un kī hauslā-afzāī ho. ³² Nabiyon kī

rūh nabiyon ke tābe rahti haiñ, ³³ kyonki Allāh betartibi kā nahīn balki salāmatī kā Ḳhudā hai.

Jaisā muḡaddasīn kī tamām jamāton kā dastūr hai ³⁴ ḳhawātīn jamāt meñ ḳhāmosh raheñ. Unheñ bolne kī ijāzat nahīn, balki wuh farmānbardār raheñ. Sharīat bhī yihī farmātī hai. ³⁵ Agar wuh kuchh sikhnā chāheñ to apne ghar par apne shauhar se pūchh leñ, kyonki aurat kā Ḳhudā kī jamāt meñ bolnā sharm kī bāt hai.

³⁶ Kyā Allāh kā kalām āp meñ se niklā hai, yā kyā wuh sirf āp hī tak pahuñchā hai? ³⁷ Agar koī ḳhayāl kare ki maiñ nabī hūñ yā ḳhās ruhānī haisiyat rakhtā hūñ to wuh jān le ki jo kuchh maiñ āp ko likh rahā hūñ wuh Ḳhudāwand kā hukm hai. ³⁸ Jo yih nazarandāz kartā hai use ḳhud bhī nazarandāz kiyā jāegā.

³⁹ Ḡharz bhāiyo, nabuwwat karne ke lie tarapte raheñ, albattā kisī ko ḡhairzabāneñ bolne se na rokeñ. ⁴⁰ Lekin sab kuchh shāystagī aur tartīb se amal meñ āe.

15

Masīh kā Jī Uṭhnā

¹ Bhāiyo, maiñ āp kī tawajjuh us ḳhushḳhabrī kī taraf dilātā hūñ jo maiñ ne āp ko sunāī, wuhī ḳhushḳhabrī jise āp ne qabūl kiyā aur jis par āp qāym bhī haiñ. ² Isī paīghām ke wasīle se āp ko najāt miltī hai. Shart yih hai ki āp wuh bāteñ jyon kī tyon thāme rakheñ jis tarah maiñ ne āp tak pahuñchāī haiñ. Beshak yih bāt is

par munhasir hai ki āp kā īmān lānā bemaqsad nahīn thā.

³ Kyoṅki main ne is par khās zor diyā ki wuh kuchh āp ke sapurd karūn jo mujhe bhī milā hai. Yih ki Masih ne pāk nawishton ke mutābiq hamāre gunāhoṅ kī khātir apnī jān dī, ⁴ phir wuh dafn huā aur tīsre din pāk nawishton ke mutābiq jī uṭhā. ⁵ Wuh Patras ko dikhāi diyā, phir bārah shāgirdon ko. ⁶ Is ke bād wuh ek hī waqt pānch sau se zyādā bhāiyon par zāhir huā. Un meṅ se beshtar ab tak zindā haiṅ agarche chand ek intaqāl kar chuke haiṅ. ⁷ Phir Yāqūb ne use dekhā, phir tamām rasūlon ne.

⁸ Aur sab ke bād wuh mujh par bhī zāhir huā, mujh par jo goyā qabl az waqt paidā huā. ⁹ Kyoṅki rasūlon meṅ merā darjā sab se chhoṭā hai, balki main to rasūl kahlāne ke bhī lāyq nahīn, is lie ki main ne Allāh kī jamāt ko izā pahuṅchāi. ¹⁰ Lekin main jo kuchh hūn Allāh ke fazl hī se hūn. Aur jo fazl us ne mujh par kiyā wuh beasar na rahā, kyoṅki main ne un sab se zyādā jānfishānī se kām kiyā hai. Albattā yih kām main ne khud nahīn balki Allāh ke fazl ne kiyā hai jo mere sāth thā. ¹¹ Khair, yih kām main ne kiyā yā unhoṅ ne, ham sab usī paighām kī munādī karte haiṅ jis par āp īmān lāe haiṅ.

Jī Uṭhne par Etirāz

¹² Ab mujhe yih batāeṅ, ham to munādī karte haiṅ ki Masih murdon meṅ se jī uṭhā hai. To phir āp meṅ se kuchh log kaise kah sakte haiṅ ki murde jī nahīn uṭhte? ¹³ Agar murde jī nahīn uṭhte to matlab yih huā ki Masih bhī nahīn jī

uṭhā. ¹⁴ Aur agar Masīh jī nahīn uṭhā to phir hamārī munādī abas hotī aur āp kā īmān lānā bhī befāydā hotā. ¹⁵ Niz ham Allāh ke bāre meñ jhūṭe gawāh sābit hote. Kyoñki ham gawāhī dete haiñ ki Allāh ne Masīh ko zindā kiyā jabki agar wāqāī murde nahīn jī uṭhte to wuh bhī zindā nahīn huā. ¹⁶ Ġharz agar murde jī nahīn uṭhte to phir Masīh bhī nahīn jī uṭhā. ¹⁷ Aur agar Masīh nahīn jī uṭhā to āp kā īmān befāydā hai aur āp ab tak apne gunāhoñ meñ giriftār haiñ. ¹⁸ Hāñ, is ke mutābiq jinhoñ ne Masīh meñ hote hue intaqāl kiyā hai wuh sab halāk ho gae haiñ. ¹⁹ Chunāñche agar Masīh par hamārī ummīd sirf isī zindagī tak mahdūd hai to ham insānoñ meñ sab se zyādā qābil-e-rahm haiñ.

Masīh Wāqāī Jī Uṭhā Hai

²⁰ Lekin Masīh wāqāī murdoñ meñ se jī uṭhā hai. Wuh intaqāl kie huoñ kī fasal kā pahlā phal hai. ²¹ Chūñki insān ke wasīle se maut āī, is lie insān hī ke wasīle se murdoñ ke jī uṭhne kī bhī rāh khulī. ²² Jis tarah sab is lie marte haiñ ki wuh Ādam ke farzand haiñ usī tarah sab zindā kie jāenge jo Masīh ke haiñ. ²³ Lekin jī uṭhne kī ek tartīb hai. Masīh to fasal ke pahle phal kī haisiyat se jī uṭh chukā hai jabki us ke log us waqt jī uṭheñge jab wuh wāpas āegā. ²⁴ Is ke bād kḥātmā hogā. Tab har hukūmat, ikhtiyār aur quwwat ko nest karke wuh bādshāhī ko Kḥudā Bāp ke hawāle kar degā. ²⁵ Kyoñki lāzim hai ki Masīh us waqt tak hukūmat kare jab tak Allāh tamām dushmanoñ ko us ke pāñwoñ ke nīche na kar de. ²⁶ Ākḥirī dushman jise nest kiyā jāegā

maut hogī. ²⁷ Kyoñki Allāh ke bāre meñ kalām-e-muqaddas meñ likhā hai, “Us ne sab kuchh us (yānī Masīh) ke pānwoñ ke nīche kar diyā.” Jab kahā gayā hai ki sab kuchh Masīh ke mātāht kar diyā gayā hai, to zāhir hai ki is meñ Allāh shāmil nahīn jis ne sab kuchh Masīh ke mātāht kiyā hai. ²⁸ Jab sab kuchh Masīh ke mātāht kar diyā gayā tab Farzand khud bhī usī ke mātāht ho jāegā jis ne sab kuchh us ke mātāht kiyā. Yoñ Allāh sab meñ sab kuchh hogā.

Jī Uṭhne ke Pesh-e-Nazar Zindagī Guzārnā

²⁹ Agar murde wāqāī jī nahīn uṭhte to phir wuh log kyā karenge jo murdoñ kī khātir baptismā lete haiñ? Agar murde jī nahīn uṭheñge to phir wuh un kī khātir kyoñ baptismā lete haiñ? ³⁰ Aur ham bhī har waqt apnī jān khatre meñ kyoñ ḍāle hue haiñ? ³¹ Bhāiyo, main rozānā martā hūñ. Yih bāt utnī hī yaqīnī hai jitnī yih ki āp hamāre Khudāwand Masīh Īsā meñ merā faḥhr haiñ. ³² Agar main sirf isī zindagī kī ummīd rakhte hue Ifisus meñ wahshī darindoñ se laṛā to mujhe kyā fāydā huā? Agar murde jī nahīn uṭhte to is qaul ke mutābiq zindagī guzārnā behtar hogā ki “Āo, ham khāeñ pieñ, kyoñki kal to mar hī jānā hai.”

³³ Fareb na khāeñ, burī sohbat achchhī ādatoñ ko bigār detī hai. ³⁴ Pūre taur par hosh meñ aeñ aur gunāh na karen. Āp meñ se bāz aise haiñ jo Allāh ke bāre meñ kuchh nahīn jānte. Yih bāt main āp ko sharm dilāne ke lie kahtā hūñ.

Murde Kis Tarah Jī Uṭheñge

³⁵ Shāyad koī sawāl uṭhāe, “Murde kis tarah jī uṭhte haiñ? Aur jī uṭhne ke bād un kā jism kaisā hogā?” ³⁶ Bhaī, aql se kām leñ. Jo bij āp bote haiñ wuh us waqt tak nahīñ ugtā jab tak ki mar na jāe. ³⁷ Jo āp bote haiñ wuh wuhī paudā nahīñ hai jo bād meñ ugegā balki mahz ek nangā-sā dānā hai, kḥāh gandum kā ho yā kisī aur chīz kā. ³⁸ Lekin Allāh use aisā jism detā hai jaisā wuh munāsib samajhtā hai. Har qism ke bij ko wuh us kā kḥās jism atā kartā hai.

³⁹ Tamām jāndāron ko ek jaisā jism nahīñ milā balki insānon ko aur qism kā, maweshiyon ko aur qism kā, parindon ko aur qism kā, aur machhliyon ko aur qism kā.

⁴⁰ Is ke alāwā āsmānī jism bhī haiñ aur zamīnī jism bhī. Āsmānī jismoñ kī shān aur hai aur zamīnī jismoñ kī shān aur. ⁴¹ Sūraj kī shān aur hai, chāñd kī shān aur, aur sitāron kī shān aur, balki ek sitārā shān meñ dūsre sitāre se farq hai.

⁴² Murdon kā jī uṭhnā bhī aisā hī hai. Jism fānī hālat meñ boyā jātā hai aur lāfānī hālat meñ jī uṭhtā hai. ⁴³ Wuh zalīl hālat meñ boyā jātā hai aur jalālī hālat meñ jī uṭhtā hai. Wuh kamzor hālat meñ boyā jātā hai aur qawī hālat meñ jī uṭhtā hai. ⁴⁴ Fitratī jism boyā jātā hai aur ruhānī jism jī uṭhtā hai. Jahāñ fitratī jism hai wahāñ ruhānī jism bhī hotā hai. ⁴⁵ Pāk nawishton meñ bhī likhā hai ki pahle insān Ādam meñ jān ā gai. Lekin ākhirī Ādam zindā karne wālī rūh banā. ⁴⁶ Ruhānī jism pahle nahīñ thā balki fitratī jism, phir ruhānī jism huā. ⁴⁷ Pahlā insān zamīn kī miṭṭī se banā thā, lekin dūsra āsmān se āyā.

48 Jaisā pahlā ḳhākī insān thā waise hī dīgar ḳhākī insān bhī haiñ, aur jaisā āsmān se āyā huā insān hai waise hī dīgar āsmānī insān bhī haiñ.
 49 Yoñ ham is waqt ḳhākī insān kī shakl-o-sūrat rakhte haiñ jabki ham us waqt āsmānī insān kī shakl-o-sūrat rakheñge.

Maut par Fatah

50 Bhāiyo, main yih kahnā chāhtā hūñ ki ḳhākī insān kā maujūdā jism Allāh kī bādshāhī ko mīrās meñ nahīñ pā saktā. Jo kuchh fāñi hai wuh lāfāñi chīzoñ ko mīrās meñ nahīñ pā saktā.

51 Dekho main āp ko ek bhed batātā hūñ. Ham sab wafāt nahīñ pāeñge, lekin sab hī badal jāeñge. 52 Aur yih achānak, āñkh jhapakte meñ, āḳhirī bigul bajte hī rūnumā hogā. Kyoñki bigul bajne par murde lāfāñi hālat meñ jī uṭheñge aur ham badal jāeñge. 53 Kyoñki lāzim hai ki yih fāñi jism baqā kā libās pahan le aur marne wālā jism abadī zindagī kā. 54 Jab is fāñi aur marne wāle jism ne baqā aur abadī zindagī kā libās pahan liyā hogā to phir wuh kalām pūrā hogā jo pāk nawishtoñ meñ likhā hai ki

“Maut ilāhī fatah kā luqmā ho gaī hai.

55 Ai Maut, terī fatah kahāñ rahī?

Ai Maut, terā ḍanak kahāñ rahā?”

56 Maut kā ḍanak gunāh hai aur gunāh shariyat se taqwiyat pātā hai. 57 Lekin Ḳhudā kā shukr hai jo hameñ hamāre Ḳhudāwand Īsā Masīh ke wasile se fatah baḳhshtā hai.

58 Ġharz, mere pyāre bhāiyo, mazbūt bane raheñ. Koī chīz āp ko ḍāñwāñḍol na kar de. Hameshā Ḳhudāwand kī ḳhidmat jāñfishāñi se

kareñ, yih jānte hue ki Ḳhudāwand ke lie āp kī mehnat-mashaqqat rāygān nahīn jāegī.

16

Yarūshalam kī Jamāt ke lie Chandā

¹ Rahī chande kī bāt jo Yarūshalam ke muqaddasīn ke lie jamā kiyā jā rahā hai to usī hidāyat par amal kareñ jo main Galatīyā kī jamātoñ ko de chukā hūñ. ² Har Itwār ko āp meñ se har koī apne kamāe hue paison meñ se kuchh is chande ke lie maḵsūs karke apne pās rakh chhoṛe. Phir mere āne par hadiyājāt jamā karne kī zarūrat nahīn paṛegī. ³ Jab main āūngā to aise afrād ko jo āp ke nazdīk qābil-e-etamād haiñ ḳhutūt de kar Yarūshalam bhejūngā tāki wuh āp kā hadiyā wahān tak pahunchā deñ. ⁴ Agar munāsib ho ki main bhī jāūn to wuh mere sāth jāenge.

⁵ Main Makiduniyā se ho kar āp ke pās āūngā kyoñki Makiduniyā meñ se safr karne kā irādā rakhtā hūñ. ⁶ Shāyad āp ke pās thoṛe arse ke lie ṭhahrūñ, lekin yih bhī mumkin hai ki sardiyoñ kā mausam āp hī ke sāth kāṭūñ tāki mere bād ke safr ke lie āp merī madad kar sakeñ. ⁷ Main nahīn chāhtā ki is dafā muḳhtasar mulāqāt ke bād chaltā banūñ, balki merī ḳhāhish hai ki kuchh waqt āp ke sāth guzārūñ. Shart yih hai ki Ḳhudāwand mujhe ijāzat de.

⁸ Lekin Īd-e-Pantikust tak main Ifisus meñ hī ṭhahrūnga, ⁹ kyoñki yahān mere sāmne muassir kām ke lie ek baṛā darwāzā khul gayā hai aur sāth hī bahut-se muḳhālif bhī paidā ho gae haiñ.

¹⁰ Agar Tīmuthiyus āe to is kā kḥayāl rakheñ ki wuh bilākḥauf āp ke pās rah sake. Merī tarah wuh bhī Kḥudāwand ke khet meñ fasal kāṭ rahā hai. ¹¹ Is lie koī use haqīr na jāne. Use salāmatī se safr par rawānā kareñ tāki wuh mujh tak pahuñche, kyonki main aur dīgar bhāi us ke muntazir haiñ.

¹² Bhāi Apullos kī main ne baṛī hauslā-afzāi kī hai ki wuh dīgar bhāiyon ke sāth āp ke pās āe, lekin Allāh ko qat'an manzūr na thā. Tāham mauqā milne par wuh zarūr āegā.

Nasīhateñ aur Salām

¹³ Jāgte raheñ, īmān meñ sābitqadam raheñ, mardānagī dikhāeñ, mazbūt bane raheñ. ¹⁴ Sab kuchh muhabbat se kareñ.

¹⁵ Bhāiyo, main ek bāt meñ āp ko nasīhat karnā chāhtā hūñ. Āp jānte haiñ ki Stifanās kā gharānā Aḥayā kā pahlā phal hai aur ki unhoñ ne apne āp ko muqaddasīn kī kḥidmat ke lie waqf kar rakhā hai. ¹⁶ Āp aise logoñ ke tābe raheñ aur sāth hī har us shaḥs ke jo un ke sāth kḥidmat ke kām meñ jāñfishānī kartā hai.

¹⁷ Stifanās, Furtūnātus aur Aḥhikus ke pahuñchne par main bahut kḥush huā, kyonki unhoñ ne wuh kamī pūrī kar dī jo āp kī ḡhairhāzirī se paidā huī thī. ¹⁸ Unhoñ ne merī rūh ko aur sāth hī āp kī rūh ko bhī tāzā kiyā hai. Aise logoñ kī qadar kareñ.

¹⁹ Āsiyā kī jamāteñ āp ko salām kahtī haiñ. Akwilā aur Priskillā āp ko Kḥudāwand meñ purjosh salām kahte haiñ aur un ke sāth wuh jamāt bhī jo un ke ghar meñ jamā hotī hai.

²⁰ Tamām bhāī āp ko salām kahte haiñ. Ek dūsre ko muqaddas bosā dete hue salām kaheñ.

²¹ Yih salām main yānī Paulus apne hāth se likhtā hūñ.

²² Lānat us shaḡhs par jo Ḳhudāwand se muhabbat nahīñ rakhtā.

Ai hamāre Ḳhudāwand, ā! ²³ Ḳhudāwand Īsā kā fazl āp ke sāth rahe.

²⁴ Masīh Īsā meñ āp sab ko merā pyār.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30